

KA HISTORY
KA
RI KHASI—JAINTIA



Acc. No. 1317/EK,1

Class No. _____ Book No. _____

Author Rynjah Inzensi

Title Ka History Ka Ri
Khasi - Jaintia.

Acc. No. 1317/EK,1

DISTRICT LIBRARY
GOVERNMENT OF MEGHALAYA
EAST KHASI HILLS

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*

Help to keep this book fresh & clean

KA HISTORY KA RI KHASI - JAINTIA

(1562—1826)

(Ia Ka Hok [Long [Trai La Tyngkai)

PART II

VOL III



LA PYNMIH DA KA NONGTHOH

Tngensi Rynjah

Ka sien shon kaba Nyngkong

La shon ha Ri Khasi Press, Shillong

1991

Shi Kyntien

Hadien ba nga la pyrshang ban lum jingtip shaphang ki Hima ba shaphang Sepngi jong ka Ri Khasi, nga la sngew dei ban pynmih ia kane ka Vol. III kaba ia dei bad ki-to ki Hima ba shaphang Sepngi. Lah ban ong ba kane ka jingpyrshang ka long tang ka jinglam lynti, namar dang bun kiei kiei kiba rieh kiba ngi dang dei ban wad bniah.

Dated Shillong:
Kench's Trace View
Kench's Trace
24th July 1991

T. Rynjah,
Head of Khasi Department
Sankardev College, Shillong,



KA HISTORY

KA RI KHASI - JAINTIA

PART II

VOL III

Jingkdew

Sla

Ki Syiem ba shaphang Sepngi jong 1—5
Ka Khasi Hills

Section I

Ka Hima Khadsawphra lane Nongkhlaw 6—25

Section II

Ka Hima Nongstoin bad Langrin 26—49

KA KTIEN LAMPHRANG

KI SYIEM BA SHAPHANG SEPNGI JONG KA KHASI HILLS

Kat kum ka khanatang la don ka jingong ba u Blei u la ibit ban ai noh ha u 'Lei Shyllong ban synshar ia ka Khyrim kaba long kawei na ki Hima ha ri Khasi. Sha palat jong ka Hima Shyllong lane Khyrim kaba don shaphang Mihngi bad baroh ki lum kaba don ha ka thain sepngi kaba iar shaduh ki Lum Garo Hills bad kiba ha ri-thor jong ka Susang-Durgapur jong ka District Mymensing jong ka Bengal lah ban jer kyrteng kum ka 'Western Khasi Hills', namar ba katto katne ka bynta jong ki ri lum ki la leit hap ha ka jingsynshar jong ki khasi ha kaba khadduh. Ia ka khanatang jong ki Khyrim kumba la kdew haneng ryngkat lang bad ia ki niam ki rukom ba iadei ha ka sain pyrthei bad ka thoh ka tar jong ki hima khasi jong kane ka thain ka pyni ba ki Syiem sepngi ki la don la slem bah, la kumno kumno ruh naduh kito ki por barim bajah tang ba ka long shabar ne sha palat ki pud jong ka ri khasi. Ka la paw shai ba ym shym la don uno uno ruh u 'lei Syiem uba la wan paw ha kato ka jaka, ia kaba ngi la khot mynta ka thain sepngi jong ka ri Khasi. Nalor nangta, ia kane ka jaka la buhai shnong da shibun ki riewlum Garo bad da kiwei kiwei de ki

riewlum Tibeto Burman bad ki Khasi ruh. Kumta ka la pynlong ia ki nongshong shnong jong kane ka thain ba kin tieng ia ki khasi namar ba ki lah ban knieh ia kane ka jaka na ki nongshong shnong Tibeto-Burman ba tynrai, kata kum ki Garo bad kiwei kiwei de.

Wat lada ia ki bynta lum jong ka thain sepngi ki la long lehse kiba khadduh ban buhai shnong da ki khasi, ia ka jingbuhai shnong jong ki riew iaid wir jong ka jaid khasi ha kane ka thain ka lah ban long naduh ka por barim. Ki khanatang jong ka jingsynshar Syiem ha kane ka thain ki pyni ba ka rukom synshar ba nyngkong eh hangne ka long kumjuh kumba ka long shawei shawei, ka sdang na ka jinglong Lyngdoh bad jinglong Basan. Kum ban shu ong la don shibun bha ki shnong rit kiba synshar da ki paitbah ba la ialam khmat da u Lyngdoh lane u Basan kum ha ka rukom u Syiem ha shuwa ba kine ki shnong ba laitluid kin iamynjur ban ia tylli kum kawei ka shnong hapoh uwei u Syiem, ia uba ki shait jied napdeng ki nongwei kiba don ka snam Syiem.

Ki daw bad ki jingjia ba bun ki la pynlong ia ki Khasi-Pnar ban leit phetwir na mihngi sha sepngi bad ban seng ia ki shnong ki thaw hapdeng jong ki ricwlum Tibeto-Burman, ka lah ban long lehse ka jing bym don ki khyndew jhum ha ki Jylla tynrai jong ki. Haba ia nujor bad ki phang mihngi jong ka ri lum ki don shibun ka khyndew na ka bynta ban rep jhum, namar ka thung ka tep-

ka dei ka kam kaba kongsan jong ki. Teng-teng pat dei tang ka jingbym don ka jingiada ka la pynlong ia shibun ki iing ki sem bad ki jaid ki kynja jong ki Khasi-Pnar ban leit wad jaka rieh noh sha kane ka bynta jong ka ri ka bym pat shym la tip bha, kata sha kine ki thain̄ sepngi.

Dei ha kane ka rukom ia shibun ki shnong ki thaw ki la seng ha ka thain̄ sepngi bad shibun ki shnong ki la ia snoh lang khnang ban ia tylli kawei. Kumta ki la jied ia u Syiem kum u khlieh duh jong ka hima barit jong ki. Ha kane ka rukom shibun bha ki hima ki la wan mih ha ka thain̄ Sepngi jong ka Khasi Hills. Shibun ki hima bad ki Syeim ki la wan mih ha ka juk pdeng kum ka Khadsawphra lane Nongkhlaw, ka Nongstoin, ka Langrin. Ka Maram lane Maharam, ka Mawiang, ka Nongspung, ka Mawsynram, ka Nong Sopho lane Nobosopho, ka Malai Sohmat, ka Bhowal lane Warbah, ka Byrung, ka Nongwah-Rani, Ka Myriaw lane Mo, ka Rambrai ka Jyrngam lane Surigam bad ka Nurtung.

Ki khadwei tylli ki hima ba la ai kyrteng ha shawa ki don ha ki khappud jong ka rithor Sylhet. Napdeng jong ki, kiba heh duh, dei ka Khadsawphra bad ka Nongstoin, ki iar naduh ka rithor jong ka Kamrup bad Goalpara ba shatei shaduh ka rithor jong ka Sylhet, katba kiwei kiwei ki hima rit ha ki pud jong ki ruh ki don la ki khyndew ki shyiap ba

ki rithor jong ka Sylhet bad Kamrup. Lehse hadien ba ki la seng ia la ki jong ki hima ha ki ri-lum, ki Syiem khasi jong ka thain sepngi ki lah ban ioh ia ki khyndew ki Shyiap ba seiso ha ki rithor kiba hajan jong ki da kaba leit phetwir lane da kaba jop thma. Kat kum ka jingbuh jingkheĩn jong ki phareng ia ka spah snem ba khadphra, ki khasi ki la ioh haduh kumba shispah laiphew hynñiew tylli ki shnong tang ha ka rithor Sylhet. Ia ki khasi ba shong ha kine ki shnong ki phareng ki khot ia ki, ki 'Bengallee Cosseahs' namar wad lada ki dei ki khasi, hynrei ki kren ia ka ktien Bengallee bad bud ruh ia ki niam ki rukom jong ki Bengallee Hindu jong ki. Ia kito ki hima ba don shaphang sepngi jong ka Khasi Hills, ki briew na rithor sylhet ki tip ia ka kum ki Lum Laur. La khot ia ki kumta lehse namar ba ha kata ka por la don kawei ka hima Hindu ba la khot ka Laur ha rithor ba markhap ia ka Sylhet ba don sharum jong ka Khasi Hills, kaba ka jingsynshar jong ka ka la iar shaduh palat jong ki rithor ba la jan kot shaduh Khasi Hills. Ka lah ban long ba ki khasi ki la jop ia shi-bynta jong ki rilum bad ki rithor na ki Raja jong ka Laur. Kum ka jingmih nangta la don bunsien ki thma hapdeng ka Laur bad ki Syiem khasi. Ynda ki phareng ki la ioh ia ka Laur ha ka spah snem ba khadphra, ki shem ba u syiem jong kato ka ri u ieng ia leh thma barobor bad ki Syiem khasi jong ka thain sepngi. Wat la katta nalog ki jingialeh pvrshah ba man ka teng ha ka khappud ki khasi bad ki briew

jong ki rithor hynrei ki kwah ba ka jingsuk
kan don hapdeng jong ki.

Kine ki san tylli ki Syiemship Khasi, ka
Rani, ka Myriaw, ka Rambrai, ka Jyrngam bad
ka Nurtung ki don ha ki khappud jong ka
Kamrup, nalar kata, ka Nongkhlaw bad ka
Nongstoin ruh ki la ioh shibun bah ki pud
ki sam ha rithor Kamrup. Ia kine ki khyndew
ki shyiap ha rithor la khot ki duars namar
lyngba jong ki ki riewlum ki shait wan hiar
sha rithor na ka bynta ka khaii ka pateng bad
kiwei kiwei ki jingthmu. Ki don khyndai tylli
kum kita ki duars ba la ioh kynti ki khasi
ha Kamrup. Ia ka thymmei bad ka jingiar
jong ki Syiemship Khasi jong kane ka jaka
un sa ai ha ki sla ba bud shadien.

SECTION 1

KA HIMA KHADSAWPHRA LANE
NONGKHLAW

Ia ka hima Khadsawphra hadien la tip ia ka kum ka Hima Nongkhlaw, ka don shaphang sepngi jong ka Hima Shillong lane Khyrim. Ki Syiem jong ka Khyrim ki don ka jingiadei ba iajan bad ki Syiem jong ka Khadsawphra kumjuh ruh bad ki brierw jong ka.

Ka jingsdang bad ka jingseng ia ka :

Ka paw ba ha shuwa ka jingseng ia ka Syiemship Khadsawphra, la don phra tylli ki shnong kaba kawei pa-kawei na ki-ka dei ka hima laitluid ba hapoh ki Lyngdoh kum ki nongialam jong ki. Kine ki shnong ki dang don haduh mynta ka sngi, ki dei 1. ka Mawthang-syar; 2. Mawsenna; 3. Nongum; 4. Nongkseh; 5. Marong; 6. Marsum; 7. Nongkhlaw; 8. Lawriat. Ia kine ki shnong la pynlong kum ka thymmei jong ka Syiemship Khadsawphra ba pawnam.

Ngi don ka daw ba biang ban ngeit ba ia kine ki shnong la shem nyngkong eh da ki nongphetwir ba na ka Hima Khyrim, kata da ki Khyrim kumba ki Jaintia ki khot ia ki brierw jong kato ka hima. Ia ka ktien Khyrim la shim na ka kyrteng Khynriam. Kat kum na ka puriskam, la ong ba ia ka khun Syiem la pynrieh khnang ba kan lait na ki jingma jong ka thma ha Nongkhlaw lane ha ka khyndew

jong ki Khyriem, dei na kata ka daw ka sa ioh shuh da kawei ka kyrteng, ka Jat Rmen lane Khyriem. Nalor kane ka jingiadei ba jan bha hapdeng ki brierw jong ka Khyriem bad ka Nong-khlaw, kumba la kdew da ka khanatang, ia ka kyrteng Nongkseh bad ia kito kiwei pat ki shnong la pynkyrteng ha ka kyrteng jong ka jaid Nong-khlaw ba paw khmat jong ka Khyrim. Lehse kane ka pyni ba ka dei ka kynhun jong ki brierw jong ka Khyrim kiba la long ki nongseng jong kine ki phra tylli ki shnong tynrai jong ka Khadsawphra. Kat kum u Dr H. Bareh u ong ba ki phra tylli ki kpoh Lyngdoh jong kito ki shnong ki wan poi na Jaintia Hills.

Ai kan long kumba ka dei ban long, kine ki phra ki Lyngdoh kiba im kyrpang la ka jong ka jong, hynrei hadien ki la sngewdon kam ban ia soh lang hapoh uwei u Syiem lane nongialam. Kumta la mih uwei u brierw uba la paw khmat bha, uba kyrteng u Shajer ha Mawthang-syar, kaba long kawei na ki phra tylli ki shnong ryngkat bad ka para jong u, ka Shaphlong ban wad spah. Ia une u brierw la ai nam kum u nongseng ia ka Syiemship ha kaba sdang da kito ki phra shnong.

U SHAJER

Ka jinglong jong u Shajer ha ka trei ka ktah ka long kaba itynnad bha. Kat kum na u Syiem Kine Singh (1876-1911) jong ka Nong-khlaw uba long u nongai jingtip ba kongsan bha ia ngi, u Shajer u wan sha Jaintia Hills bad u iadei kur bad u Raja jong ka Jaintia ba ha kato ka por ia uba ka kyrteng jong u ym shym

la pynpaw. Hadien ba u la iehnoh ia la ka ri-lum tynrai la jong, la ong ba u la shu shang sakma shane shatai bad la ka para katto katne por ha Kamrup. La ong ba ka Shaphlong ka la bud ia u ha kata ka jingiaid na ka daw ba kam ioh ia la ka spah ka phew ha Jaintia Hills.

U Shajer u la pynlut katto katne por ha Bar duar (Kamrup). Hangne u la ia kynduh ia uwei u Don Ahom uba la die noh katto katne ki khyndew sha u tang ba hadien pat u la kyn-tait noh ban ai ia ki. U Shajer bad la ka para ka Shaphlong ki la iehnoh noh ia ka Barduar bad ki la iaiaid shaphrang sha ki thain ri-lum, dei hangta u la lap ia ki phra shnong ba la jer kyrteng haneng ba kim don Syiem. Ki Lyngdoh ynda ki la sngewthuh ba kine ki dei na ka kpoh Syiem ki la pynlong ka Dorbar bad ki la jied ia u sha-jer kum u Syiem nongsynshar jong ki bad ia ka Shaphlong kum ka Syiem Sad.

Hadien katto katne por, u Shajer u la ialam ia ka kynthun shipai na la ka hima ban hiarthma ia ka Barduar. Kumta u la jop ia u Don Ahom ha ka thma bad u la knieh ia ka Barduar. N-
duh ba u la jop, u la pynbynta ia la ka por hapdeng ka hima Khasi jong u bad ka Barduar. U Shajer u la synshar ia la ka hima. Kumba katto katne snem ei ei hadien, u sa iap noh bad u la iehnoh ia ka kam nongialam ha ki pyrsa shynrang jong u kiba na ka Shaphlong.

F. Note (1) Barduar-ka long kawei na kita ki khyndai duar ha Kamrup, ka long kaba heh tam, ka don ha kjat ka hima Nongkhlaw. Ia kane la pynlong da u Syiem Nongkhlaw haduh ka por ka jingwan ki phareng.

KA TARIK ANTAD IA KA POR BA SENG IA KA HIMA

Ia ka kyrteng kaba nyngkong eh ia ka Hima ha ka por ba ki seng ia ka ym lah ban pynthikna, hynrei ym don jingartatien ba u Shajer u dei u Syiem ba nyngkong eh jong ka hima. La don katto katne ki puriskam kiba thoh bad kdew ia ka kyrteng jong u Shajer. Ka khanatang ka pyniasoh ia u bad u Sahejr Nangli, u riew-shlur jong ka Jaintia ia uba la iathuh ba u la ialam noh ia la ki jong ki nongbud shabar ri, sha ka ri jong ki Angami Naga bad kumta ter ter. Bun na ki kim don jingshisha ha ka History.

Hynrei u Shajer u dei u briew uba ngi tip ha ka history, wat la katta ruh ia ka tarik ka jingseng ia ka Syiemship jong u kam long kaba suk ban wad. U Kine Singh ha ka jingthoh jong u sha ki phareng ha u snem 1903 A.D. u la iathuh ba ia ka hima Nongkhlaw 'la pynlong nyngkong khadsaw pateng mynshuwa' la it noh iaka jong u lehse. U Dr H. Lyngdoh u la pyrshang ban buh jingthoh ia ka snem jingsynshar jong u Shajer hapdeng ka snem 1524 & 1554 A.D. Hynrei ym shym la batai ia ka nongrim jong ka jingbuh jingthoh jong u bad ia ka jingbuh jong u ia ka snem synshar kam shym long kaba shongnia na ki bun ki daw. U Dr. H. Bareh u la buh ia ka por ka jingsynshar jong u Shajer ha pdeng 1500 & 1600 A.D., hynre khlem da ai ia ka nongrim ka jingmut dur jong u.

Kumta la pyrkhat ba kine ki riewpule bastad ki la dei ban pyrshang ban kheiñ ia ka por jong ka snem synshar naduh ka tarik jong ki Syiem kiba la tip haduh ka jong kito kiba kim pat tip. Kum ban shu ai nuksa, ka por jong ka jingsynshar jong u Tirot Singh lah ban pynthikna na ki record jong ki phareng kiba iathuh ba u la kiew khet hadien jong u Konrai (U Chattra Singh ha ka record ki phareng) ha u snem 1826 A.D. Kat kum ka list jong ki Syiem Nongkhlaw ba la ai da u D. Herbert, u H. Lyngdoh bad u Dr H. Bareh ki don ka jingiapher jingmut khyndiat uwei ia uwei. Kum ban shu pyni nuksa, u Herbert u la iehnoh noh ia ka kyrteng jong u Khangthoh uba la paw ha ka list ba shna da u H. Lyngdoh bad u H. Bareh. Na u H. Bareh ngi ioh shuh sa kawei ka kyrteng, u Khongjer u bym shym la paw ha ka list jong kitei baroh arngut, kata ha ka jong u Herbert bad u H. Lyngdoh. Hadien ba la bishar bniah ia kito ki list, ngi lah ban mutdur ba ka list jong ki Syiem Nongsynshar naduh u Shajer haduh u Tirot Singh lah ban ong ba ka long kumne harum:—

- | | |
|--------------------------|------------|
| 1. U Shajer | 1626-1651. |
| 2. U Khangthoh | 1651-1676. |
| 3. U Syntiew | 1676-1701. |
| 4. U Jom | 1701-1726. |
| 5. U Soh | 1726-1751. |
| 6. U Sngi | 1751-1776. |
| 7. U Ram Singh | 1776-1801. |
| U Konrai (Chattra Singh) | 1801-1826. |
| U Tirot Singh | 1826-1834. |

Lada ngi shu buh antad ia ka jingsynshar jong ki kumba arphewsan snem ia uwei uwei na kine ki phra ngut ki Syiem kiba la synshar ha shuwa jong u Tirot Singh, kata ka tarik jong ka jingkiew khet jong u ka long 1826 A.D kumta, ngi ioh ia ka tarik jong ka 1626 A.D.-(1826-200 $(8 \times 25) = 200$) ia kaba ngi lah ban shim kum ka tarik jong ka jingkiew jong u Shajer sha ka jinglong Syiem. Haba shu buh da kumwei pat, ka tarik antad jong ka jingsdang ia ka Syiemship Nongkhlaw lane Khadsawphra ka la long ha ka 1626 A.D. La ha kano kano ka rukom ruh, ia ka jingsdang ban seng ia ka hima lah ban buh ha ka spah snem kaba khadhynriew kumba la ai jingmut da u H.Lyngdoh bad u H.Bareh.

KA JINGPYNIAR IA KA HIMA NONGKHLAW

Shaphang u Nongkiewkhet ba bud ryngkhi hadien jong u Shajer la don artylli ki jingiathuhkhana puriskam ba iapher kawei ia kawei. Kat kum na ka khanatang, u H. Bareh ia kine ki arngut ki khun shynrang jong ka Shaphlong, u Khongthoh bad u Khangjer ki dei ban long ki nongiohpateng jong u Shajer. La ong ba u Khongthoh u la jop ia ka Mawmluh, ka nongrit ba hajan Sohra kaba don shathie sharum bad kaba iajan bad ki khappud jong ka Sylhet. Kum ka dak ban pynsah jingkyinmaw ia ka jingjop jong u, u la pynieng ia uwei u maw uba heh ha

Mawmluh, une u dang don haduh mynta bad la tip ia u kum maw Khongthoh. Ha kawei ka khanatang la ong ba u H.Lyngdoh u la iathuh ba ia u Shajer la bud da u Syntiew bad ia u pat la bud da u Khongthoh. U D.Herbert u la iamynjur bad u H.Lyngdoh, Hynrei baroh arngut kine ki nongthoh ki iathuh ba ia ka Mawmluh la pynioh da u Shajer, ym dei u Khongthoh. U Khongthoh wat la u wan hadien jong u Shajer, lane u Syntiew, hynrei u Khongthoh te imat u dei ban long u brieve jong ka history namar u kwah ban pynsah jingkyndaw ia ka u pynieng khnang ha Mawmluh da uwei u Mawbynna uba heh. Hynrei shaphang u Khongjer kumba la ong u dei u nongiohpateng jong u Khongthoh, hynrei ym don kano kano ruh ka jingtip shaphang jong u. Namar kata ngi hap ban kohnguh ba ia u Khongthoh lehse la hiar pateng da u Syntiew.

U SYNTIEW 1676—1701

U Syntiew u long u Syiem uba donbor, u la pyniar bad pynheh ia la i jong i jylla barit na baroh arliang na shatei bad shathie da ka jingleit hiarthma ba khlem sangeh jong u, khnang ban ioh rah ia ka sha ka burom ba ha khlieh duh. Ka khanatang ka iathuh, ba dei ma u uba la pynioh ia ka Sohrarim bad Mawmluh na ka jaid Nongkynrih da kaba shu thied. Ki Nongkynrih ki kheih ia u la kum u jong u Syiem. Lehse hadien ka jingpynioh jong u ia kine ki khyndew, u la pyniar ia la ka jong ka bor halor ka thain Shella ka ha kata ka por ka la kynthup ia ki khyndai

tylli ki shnong, kata ka Mustoh, ka Nongbah, Nongtraw, Dew saw, Tynger, Tynrong, Nongwar Nongshluit bad Shella. Ha ka jingleit tur ba shaduh khap shathie sharum bha u la pyniar ia la ka jingsynshar sha ki rithor jong ka Sylhet bad hangto u la seng ia kawei ka kut shipai ha Dewanganj. Ka Hima Nongkhlaw ka la duh noh ia ki kyntoit shnong jong ka Shella bad ka Dewanganj lehse shen shen hadien jong u Syntiew.

U Syiem Syntiew ruh u la pyniar ia la ka jong ka jingsynshar halor ka khyndew ka shyiap baiar bha ha ka phang ba shatei. La ong hana ba u la pynioh ia ka Sohiong bad u la pyniar ia la ka jong ka bor halor ki Syiem jong ka Nongpoh. Kumta ha ka por ka jingsynshar jong u syntiew ka Syiemship jong ka Nongkhlaw ka la synshar halor ka Hima bah Hima san baiar shaduh Dewanganj ha Sylhet ba shaphang shathie.

Na ka bynta ka jingiar u pud u sam naduh ri-lum shaduh ri-thor lehse ka la donkam ban pynkylla biang ia ka synshar ka khadar jong ka hima. Kumta u Syntiew u la thung ia u Syiem khynnah uba lehse u dei u Syiem Laitlyngka I ban synshar bad ban peit ia ki shnong rit ba shaphang shathie kaba kynthup ia ka Sohrarim, ka Sohra, ka Mawmluh, ka Shella bad ka Dewanganj. Nalor jong ki pat u la thung ia ki arngut ki para kynthei jong u, ka Senglar bad ka Jem ban peit ban khmih ia ka jingsynshar ha Nongkhlaw bad Sohiong. Lehse u la pynlong ia ka Barduar ka jaka pdeng kaba kongsan eh bad

dei nangta u peit bad pyniaid ia ka jingsynshar jong ka jylla baiar jong u. Ka jingbate ia ka bor synshar jong u Syiem bad u Syiem khynnah, Laitlyngka I bad ki arngut ki para kynthei jong u ka la wallam pynban ia ki jingmih bym shym poi pyrkhat lypa. Ha kawei ka liang, ki Syiem khynnah ki la pyrshang ban synshar laitluid syndon, bad na kawei ka liang pat ki artylli ki jaid Syiem, kata ki Syiemlieh bad ki Syiemiong ki la wan mih ban dawa ia ka Syiemship ha ka Hima katba nangiaid ka por. Kumta ka hima ka la kylla long noh tang ka jingiateh ba synjor ha kaba uwei pa uwei u nongsynshar u la pyniaid da la ka jong ka bor ha la ka jong ka bynta. ynrei ha ka por ka jingsynshar ba khlain bad ba donbor jong u Syntiew kito baroh ki jingiapher jingmut kim shym la wan mih.

U JOM BAD U SOH (1701-1751)

Ia u syntiew la hiarpateng da u Jom, u Jom u dang bteng hi ia ka rukom pyniar hima jong ki Longshuwa jong u. La ong ba u la nang ioh shuh shuh da ka jingjop jong u ia ki khyndai shnong jong ki Syiem Nongsai jong ka Nongpoh kiba don shaphang shatei jong ka Syiemship Nongkhlaw. U la lah ruh ban pynneh ia ka bor jingsynshar halor ka shnong rit ba shaphang shathie jong ka hima.

Hynrei u Nongiohpateng jong u, u Soh u la long u nongsynshar batlot. Lehse ka la dei ha ka por ka jingsynshar jong u, ba ka Syiemship Nongkhlaw ka la shah bishni ha ka hima ba dang lah shem thymmai jong ka Sohra kaba la don hapoh u Buh Singh Lyngdoh bad ka la shah shibun ki jingkylla ha ki kti jong ka. La ong ba u Syiem khynnah, u Lait Lyngka I jong ka Nongkhlaw uba shisien mynshuwa u la pynsniew noh ia ka jingpyrshang jong u Buh Singh ban pyniasnoh ia ka Sohra (Upper Cherra), u la shah pyniap noh ha ka jingia kajia kaba hapdeng ki arngut ki Bakhraw jong ka jaid Khar-Ngap-Kynta, kiba long ki nongbud ba shisha bad iai neh jong u Lait Lyngka I. U Buh Singh u la shim kabu halor kane ka jingiap jong une u Syiem bashlur jong ka Nongkhlaw da kaba pyniar ia la ka jingsynshar shaduh Sohra. Kumta ka Nongkhaw ka la duh noh ym tang ia u Syiem baklain bad donbor hynrei ka la duh lang ruh ia ka hima kaba la kylla long ha kaba khadduh khadwai ka nongbah jong ka hima ba dang shu khie ba la seng da u Buh Singh I. U Soh lehs u la duh noh ruh ia la ka bor kaba la long halor ki khyndai Shnong jong ka Shella ba ka Dewanganj ba don ha Sylhet.

U SNGI 1751-1776

Hamar kane ka por, u Sngi (1751-1776) u la jop bad kiew khet hadien jong u Soh. I kumba u la pdiang ia ka jingaireng jong ki

Syiem jong ka Mawsmmai-Sohra ha ka jingkut jingmut ban pynioh biang ia ka burom bad ka bor shipai ba ha khlieh duh jong ka Syiem-ship Nongkhlaw da ka jingpyni ia ka bor jong ka ha ka phang shathie. Ka jingthmu jong u kam dei ban pyniasoh ia ka khyndew ka shyiap hynrei ban pynsaja ia ki arngut shipara jong ka jaid Khar-Ngap-Kynta kiba la pyniap ia u Lait Lyngka, u Syiem Khynnah bad ruh ia u nongiada nongia kyrshan jong ki Syiem Mawsmmai-Sohra. Da kane ka jingthmu u la ialam khmat ia ka kynhun shipai ba khlain bor shibun pyrshah ia ki. Wat la um shym la lap ia ki nongpyniap u la pynjulor kput ia u nongker nongda jong ki u Syiem jong ka Mawsmmai-Sohra, u Buh Singh II. Hynrei pynban um shym la knieh noh na ki ia kano kano ka khyndew ka shyiap.

U Sngi u la leh sa kawei ka kam shlur na ka bynta ka nam jong ki Syiem Nongkhlaw da kaba u knieh noh ia ka Mairang na ki Syiemiong jong ka Nongspung. Na ka khana-tang U H. Bareh la ioh jingtip shaphang ki lad ki lynti bad ki buit ba la pyndonkam da u Sngi bad ki myntri jong u ha kaba pyniasoh ia kane ka jaka ba donkam. La ong ba hana hadien ka jingpyniasoh ia ka Mairang, u Sngi u la khot kyrteng noh ia la ka hima "Ka Khadsawphra." Balei u la khot kyrteng kumne ia la ka hima, ngim lah ban tip shai? Hynrei lehse ka lah ban thew sha ka jingsynshar jong u ba ka long halor ki phratylli ki shnong tynrai ba nyingkong bad ia khadsawtylli ki shnong ba la jop.

Ki Jingia-kynad-Jingiapra ba napoh

U RAM SINGH (1776-1801)

U Ram Singh u la jop ia u Sagi. Ha ka por ka jingsynshar jong u, ki jingiakynad poh iing ki la mih ha ka iing Syiem Nongkhlaw kaba la thaw sha ka jingjot jongka hima. Ia u Ram Singh la pynmatlah da uwei na ki kur jong u, uba imat u la iadon bynta bad u Syiem jong ka Sohra. Ia une u nongleh ia ka kam sniew, u Lar Singh hadien ba u la pynmatlah ia ki khmat jong u Ram, kumta u la leit phet iap noh ban ioh jingiada sha u Syiem jong ka Sohra. U Ram Singh ruh u la iap noh shen hadien katto katne.

U KON RAI lane U CHATTRA SINGH

(1801-1826)

Hadien ka jingiap ba sngewsynei jong u Ram Singh, u Konrai ia uba ngi tip ha ki jingthoh jong ki phareng kum u Chattra Singh u la kiew sha ka jinglong Syiem ha Khadsawphra. Hynrei u la bat ia ka bor synshar tang ia ki bynta ka khyndew ba shatei jong ka hima kaba kynthup ia ka Nongkhlaw bad ia ka Barduar, katba lehse u la thung ia la u pyrsa kur, u Hain Singh kum u Syiem khynnah jong ki shnong ba shathie jong ka hima da kaba pynlong ia ka Mawmluh kum ka jaka pdeng.

Kawei na ki jingjia ba kongsan ha kata ka por ka la dei ka jingleit hiarthma jong u

Hain Singh bad u Lait Lyngka II pyrshah ia u Dewan Singh, u Syiem jong ka Sohra uba la ai jaka rieh bad jingiada ia u Lar uba la pynmatlah ia u Ram Singh. U Hain u la dawa pynphai noh ia u nongkam sniew jong u hymmen jong u, u Ram Singh na u Syiem jong ka Sohra, uba ma u pat u la kyntait ia kata. Hangta hi, u Hian bad u kur jong u, u Lait Lyngka II ki la hiar thma ia ka Sohra, ki la pyniap ia u Lar bad pyndem ia u Dewan Singh jong ka Sohra. Hadien ba la pynsaja ia ki, u Hain u la weng noh ia la ki kynhun shipai na Sohra, kane ka la wan rah ka jingiashun ka bakhraw bad ki Syiem jong ka Nongkhlaw naduh kata ka por. La ong ba ka dei ka jingiashun kaba pynlong ia u Dewan ban iateh lok noh bad ki phareng hadien ha ka thma ba pyrshah ia u Tirot Singh, u Syiem jong ka Nongkhlaw.

U Hain Singh hadien u la iakajia bad u Kni jong u, u Konrai, kaba mih nangta ka dei ka thma. Ngi la kdew lypa ba ka rukom thung ia u Syiem khynnah ban synshar ia ki shnong ba shaphang shathie jong ka hima ka la wallam ia 'Ki jingmih bym shym poi pyrkhat.' U Hain imat u don ka jingthrang ban ioh ka jinglaitluid da kaba pynkhein ia ka bor jong u kni jong u, u Konrai. Dei namar ba u la synshar laitluid ha Mawmluh, ki jingthoh jong ki phareng ki la sngewthuh bakla ia u kum u Syiem jong ka Nongkhlaw. Hynrei ha ki jingjia ba jia hadien ki pynpaw shai ba u dei u Syiem khynnah. Katba ha kajuh ka por

hi, u Konrai u la ialam ia ka kynhun shipai ban pynshitom ia u pyrsa ba ialeh pyrshah jong u. U la knieh ia ka nongbah jong u Hain, ka Mawmluh bad u la pynjulor ia ka. U Hain ryngkat bad la ki nongbud ki la leit phet iap sha ka jaka lum ba marjan ba ki khot ka Laitkynsew. Ha kaba khadduh khadwai u la pyndem ha u Konrai bad la aiti ia lade ha ka jinglong Syiem jong u. Ia kane ka khanatang jong ka thma hapdeng u Konrai bad u Hain Sing bad ia ka jingpyndem noh jong u Hain Sing ym shym la mynjur ha ki jingthoh jong ki phareng, hynrei ki la pyni ba u David Scott, u Agent jong ki u la ithuh ia u Konrai kum u Syiem jong ka Khadsawphra.

U Konrai u la pynlut kham bun la ka por ha ki ri-thor jong ka Barduar (Kamrup) bad ka la kylla long shisha ka nongbah jong u, hynrei u Tirot Sing u pyrsa kur jong u, u la synshar naduh Nongkhlaw ka bynta rilum jong ka hima. Kat kum ka jingthoh ki phareng, u Konrai u la sngewkwah ban pdiang ia ka jingtyrwa jong u Dabid Scott ban shna ia ka surok lyngba ka ri jong u naduh Gauhati shaduh Sylhet. Hynrei u Tirot Singh uba la bat ia ki bynta ri lum jong ka hima ha kaba nyngkong u la ia pyrshah ban ai ia kano kano ka khyndew na ka bynta ban shna surok naduh ka pud ka sam jong u. Kum ka jingmih nangta, u Dabid Scott u la pynsangeh shipor ia la ka jingthmu na ka bynta ban shna ia kata ka surok. U Konrai lehse u la iap noh na ka snem 1826 A.D.

U TIROT SINGH : 1826 - 1834 A.D.

U Tirot u khun jong ka Ksan Syiemlieh u la kiew ia ka khet Syiem jong ka Khadsawphra, hadien jong u Konrai u hynmen jong u. Kat kum ki jingthoh jingtar jong ki phareng ha ka por ka jingkiew khet jong u Tirot Singh ka la don ka jingiakynad. U Nongdawa ba ia pyrshah eh ia ka jinglong Syiem jong u, u long u pyrsa kur jong u u Konrai, u Rujjon Singh, ki phareng ki la nang kham pynkulmar shuh shuh ia kane. U David Scott u la thoh sha ka dorbar jong ka hima kaba tang ma ka hi kaba don ka hok ban jied ia u Syiem bad ba ki phareng kin ym ai ia ka Barduar (kaba ki la ioh na ki Ahom) sha uno uno u Syiem, ia kaba ia ka bor jong u ym pat shym la ithuh ha ki rilum bad rithor, bad lada u kyntait ban ai ia ka hok ka jing-iaid jingieng lyngba ka ri jong u hynrei u dei ban niew ia ka bor ba ha khlieh duh jong ka East India Company kum u Raja ka Jaintia. Ka Dorbar hadien ba ka la pyrkhath ia ki jingdawa pyrshah ka la buh sharud ia ki jingdawa jong u Rujjon Singh uba dang rit bad ka la jied ia u Tirot Singh kum u Syiem jong ka Khadsawphra lane Nongkhlaw. U Tirot Singh u tip ba ki riwulum ki ia long pyrshah ia ka jingwan rung jong ki mynder ri sha ka ri jong ki, ma u hi u la ia pyrshah ia kata ha kawei ka por - tang ba lehse u sngewbynnud ioh duh noh ia ka Barduar, ka jaka kaba sei soh bha bad ba ka long kawei

na ki jaka khaii pateng bad ki ri-thor lada u kyntait noh ia ka jingtyrwa jong u Scott. U la pyntip sha u Scott ba um sa buh ia kata ka jingtyrwa jong u ha khmat ka dorbar pyllun jong ka hima ban ia pyrkhat lang bad u la khot sngewbha ia u ruh ban iadon lang ha Nongkhlaw ha ka por ban long ka dorbar.

Ia kata ka dorbar bakhraw la pynlong ha ka 3 tarik u November, 1826 ha Nongkhlaw, ka bym pat shym la long ka shnong kaba heh ha kato ka por. La ia don hangta kumba san ne hynriew spah ngut ki bakhraw batri kynthup ruh ia ki katto katne ki para marjan na ki khappud. U Scott hadien ka jingiaid lynti ba la thait shibun naduh Gauhati shaduh ki rilum u sa poi ha Nongkhlaw ryngkat bad u Captain White ban poi shaduh shajan ka jaka jong ka jingialang. U Captain White u la iehnoh ka jingthoh ba sngewtynnad shaphang kane ka 'Gosayah Parliament' (Ka dorbar pyllun jong ki khasi) ia kaba u la ong ba la pyniaid ia ka ha ka rukom ba i shong kun bad ba jai jai bha ha ki por ba ia saitnia kumba long ha ka iingmane jong ka St. Stephen England. Hadien ba la ai jaka ia ki Syiem ha ka dorbar pyllun ba la pynlong habar iing, u Syiem Tirot Singh hangta u sa batai ia ka jingthmu jong kata ka jingialang bad u la khot sngewbha ia ki Syiem kiba baroh ki la kieng ia la ki jong ki tiar ialeh thma khasi, kum ki waitlam ba don arliang jingbat, ka stieh, ki ryntieh bad ki ryngkap khnam ba kin pyni

ia la ki jong ki jong ki jingmut halor ka jingtyrwa jong ka Sorkar phareng. U Syiem nongialam shisyndon u la ieng joit ban ia pyrshah ia ka jingtyrwa da ka jingdap mynsiem bad sngewlynga ha ka jingbitar. Nangta u nongkren na ka liang jong u Raja pat u jubab ia kata. Ha kane ka rukom, uwei u nongkren hadien uwei pat ki sa pynpaw ia la ki jong ki jingmut halor kata ka kam. Ia uwei pa uwei u nongkren ba pnah la ai lad kat ba u mon ba un ai ia la ki jong ki jingmut. Ka jingiatai nia ka la neh arsngi pura. Ha ka janmiet jong ka sngi nyngkong jong ka jingiatai nia, u Scott um sngew lah shah shuh bad u la kwah ban pynsangeh noh ia kane ka jingia tai bajrong, kumta u la phah shi dorjon ki bitor kiad um sha ka jingialang. Hynrei ia kata ka kiad la pynphai noh ryngkat bad ka khubor ba kim ju dih ia ka kiad tad haduh ynda ki la dep rai ia ka kam. Ha ka step kaba bud pat, ka jingiatainai ka la sdang biang bad ka la bteng baroh shisngi, ha kata ka rukom ka la kut haduh shiteng miet da kaba pynnoh ia ka sha ka jingtyrwa jong u David Scott. Ka jingialang jong ki Syiem ka la ai bor ia u Tirot Singh ban pyndep ia ka jingiateh bad ka Sorkar phareng hynrei ka la paw shai ruh ba la mih shibun ka jingia pyrshah halor kane na shibun bah ki Syiem kiba la ia don lang ha ka dorbar pyllun. (Memoir of David Scott by Capt. White).

Ia ki kyndon jong ka jingthoh jingiasuk bad ki nongshun la khreh ha ka ktien Bengali

ba ka dei ka ktien ba u Syiem u sngew
 thuh ia kata la pynkylla sha ka phareng. La
 soi ia ka da u David Scott na ka bynta ka
 Sorkar bad da u Tirot Syiemlieh, u Raja jong
 ka Nongkhlaw na ka bynta jong baroh lang
 ki Syiem.

Ka jingiateh kular ba la soi ha u November,
 1826 ka don baroh kumba hynriew tylli ki
 kyndon ia kiba lehse la lah batai ia u Tirot
 da u Ophisar Bengali, jong u nongkhaii shun jong
 ki phareng, u George Inglis uba la leit lang
 bad u Scott sha Nongkhlaw. Ha ka kyndon
 ba nyngkong u Tirot Singh da ka jingmynjur
 jong ki Syiem u la kohnguh ban long u briew
 jong ka Company ba don burom. Ha ka
 kyndon ba ar bad ba lai jong ka jingiateh u
 la mynjur ban ai ei ia ka surok ia id lynti
 jong ki shipai phareng bad ban pynbiang ia
 ki tiar ki tar na ka bynta ban tei ia ka surok
 lyngba ka hima jong u bad ba un peit bad
 pynneh ia ka. Nalor kitei sa kiwei kiwei pat
 ki kyndon, ka Company ka la kular ban ai
 jingiada bad ban kyrshan ia u Raja lada jia
 ba u shah hiar thma bym dei hok ha kino
 kino ki nangshun, bad ba u Tirot Singh u
 mynjur ban shakri ia ka Company da ki shipai
 jong u lada jia ba khie ka thma ha Assam.
 Ia kane ka kyndon ruh la pynrung lang ha
 ka jingiateh kular namar ba u Scott u sheptieng
 ioh ka khie biang ka thma hapdeng ka Com-
 pany bad ki Burmese kaba dang jia shen ha
 u snem 1824. Ka Company ka la ai ka jing-

kular ba shisha ba kan ym mushlia ha ka synshar ka khadar kam iing jong ka hima jong u Raja.

Kata ka la long ka jingiateh kular ba paw-nam shibun kaba la pyni ia ka jingsdang jong ka jingwan rung jong ki phareng bad ka jing-long khlieh duh jong ki ha Khasi Hills, kaba da ki spah snem ka la pynneh ia la ka jing-long ba laitluid.

Sheh shen hadien ka jingiasoi ia kane ka jingiateh kular, u Scott u la kyrpad ia u Tirot Singh ban ai lehse ia kawei ka khyndew ha Nongkhlaw khnang ban shna ia kawei ka iing. U da iaroh ia ka jinglong ka suin bneng ba pyngad jong ka hima Nongkhlaw, dei tang hangne ba lah ban ioh ia ka lyer ba pyngngad, kata ka 'European air'. U Tirot Sing um sngew mon namar ba ki briew jong u ki ia pyrshah ia ka jingpynlong iing jong ki mynder ha ka ri jongki. Hadien ba la pynbor bha, bad khlem da pyrkhath ia kane ka jingpyrshah ba shyrkhei, u Tirot Singh ha kaba kut u la shah ia kane ka jingkyrpad jong u Scott.

Katba u Scott u la nang sngewhun bha ia kane ka jinglah ka buit jong u ban shu rung beit sha ri Khasi, u Tirot Singh ruh ha kaba nyingkong um shym poi pyrkhath ban mih kano kano ka jingsniew na ka jingiateh kular. Ha kawei ka liang pat, u la pyrkhath lehse u la jop ha kaba pynsah pynneh ia ka khyndew ba heh

bad ba seisoh kum ka Barduar ha ki ri thor
 bad ia ka kabu ba la ioh ban ia khaii bad
 ka Kamrup da ka jingiateh lok bad ka Company.
 Hynrei shen hadien kata u la sngewsih ba u
 la duh noh ia ka jinglailuid ba kordor jong
 ka ri jong u tang na ka bynta ki jingmyntoi
 kiba rit eh. Ka jingsngew jong ki biew jong
 ka hima ruh ka la nang kylla kthang shuh
 shuh da kane ka jingwan rung shapoh jong ki
 mynder ri. Da kine ki jingjia, u Tirot Singh
 suki suki u la dei ban jied da ka lynti jong
 ka jingialeh bad ka thma pyrshah ia ka Sorkar
 khnang ban ioh biang ia ka jinglailuid jong
 ka ri jong u da ka jing bym pdiang shuh ia ka
 jingiateh kular. Ia kata ka jingiathuh khana
 yn sa iathuh ha ka bynta ba shadien jong ka
 history jong ka Khasi Hills.

Hapdeng ki artylli ki spah snem jong ka
 jinglong jong ka kam, ka hima ba lailuid ka
 syiemship jong ka hima Nongkhlaw ka la shim
 ka bynta ba donburom tam ha kaba pyniar
 ia ka bor ba ha khlich duh jong ki khasi
 ha ki rithor bad kumjuh ruh ha ki ri lum.
 Ki Syiem ym tang ba ki peit ngor ban pyniar
 bad iada ia ka jinglailuid, hynrei ruh ki la
 shim ki lad ki lynti ba ka bynta ban khaii
 ban pateng bad kumjuh ruh na ka bynta ka
 jingroi bad man bha lang jong ki biew baroh.

SECTION II

KA HIMA NONGSTOIN BAD LANGRIN

Ka Hima Nongstoin ka don shaphang sepngi na khadsawphra Syiemship. Kane ka hima ka long kaba heh bha, ki pud ki sam jong ka ki iar bha ha ka thain sepngi shaduh sha ki ri lum Garo bad ki rithor jong ka District Mymensing, katba ha ka thain mihngi pat kumba la pynih mynshuwa ki pud ki sam jong ka ki ia kynduh bad kito ki jong ka Khadsawphra (Nongkhlaw) bad ki katto katne kiwei pat ki hima rit. Ha ki bynta ba shaphang shatei ka Nongstoin Syiemship ka kynthup ym tang ia ka khyndew ka shiap jong ka ri lum, hynrei ia ki shnong rit ruh kiba don kham sha jngai jong ka Brahmaputra. Na shaphang shathie, ia ki lum Nongstoin bad Langrin la tip kum ka Laur ha ki thain jong ka Sylhet bad ki kynthup katto katne ki khyndew ba kham sha pajih jong ka Wah Surma. Na kane ka jingthew jingwoh ia ka jingiar jong ki pud ki sam jong ka Nongstoin, ngim dei ban tharai ba ka dei beit tang kawei ka hima, namar ba ki khyndew ki shyiap jong ka hima khasi kim iajan kawei ia kawei. Lah ban pynsyriem ia ka bad ki kynhun ba saphred jong ki shnong ki thaw ba don hapoh uwei u nong-ialam lane u Syiem. Ka don ka daw ban ngeit, kum ban shu pyni-kai, ba ka Syiemship jong ka Langrin ba mynta bad ka Syiemship jong ka Nartung ba la jah noh. Kine baroh ar mynnor ki la long ki trai jong ki khyndew ki shyiap jong u Syiem jong ka Nongstoin.

Ka Jaka Tynrai Jong Ka Syiemship

la ka tynrai jong ka Syiemship Nongstoin la-kah dum da kiei kiei kiba-phylla bad ki puriskam. Ka khanatang jong kane ka jylla ka pyniasoh ia ka jaid Syiem bad ka wah Someswari jong ka Garo Hills bad wat bad ka Susang Durgapur, ka hima Hindu kaba don ha ka District Mymensing kaba don mar syndah bad ka kjat lum ba shathic jong ki lum Garo bad Khasi. Lada ia ka puriskam Khasi bad Garo ngi ngeit ba hana shisien ki la long ki nongshong shnong ha ka khyndew harud ka wah Someswari bad Susang Durgapur ba dei na kane ka jaka ki wan kynriah noh sha ka shnong Nongstoin na ka bynta ki katto katne ki daw bym shym la batai shai. Kat kum kane ka puriskam, ka Susang Durgapur ka dei ka jaka tynrai na kaba ka Syiemship Nongstoin ka mih. Naduh shuwa ka jingwan hiar thma jong ki Aryans ia kane ka bynta ka khyndew ba khappud jong ka Khasi bad Garo Hills la buhai shnong da kiwei pat ki riwlum bad ki nongsynshar ba ha shuwa ki Aryan, ka lah ban long lehse ba ki Khasi bad ki Garo ki la long ki nongshong shnong ba tynrai eh jong ka Susang-Durgapur. Hynrei ka lah ban long ba ki shah beh noh lane namar ba kim kwah ban pyndem ha ki Syiem Aryan ban ai ia la ka khyndew ka shyiap, Kumta u rangbah nongialam jong ki riwlum u la leit wad jaka rieh noh ha ka jaka ba ngi tip kum ka Nongstoin. Kat kum ka history jong ka iing jong u Raja

jong ka Susang Durgapur, u nongseng jong ka jylla u dei u Brahmin (kata u Aryan) ba na shaphang shatei ka India bad u la seng ia ka jylla ha ka spahsnem ba khadhyrniew A.D. Ka jingleit phet wir jong ki Khasi bad ki Garo na Susang-Durgapur sha ka jaka kaba ki shong mynta ka Nongstoin ka la jia hi hamar kata ka por.

Ki Puriskam khasi shaphang ka tynrai jong ka Syiemship

Kat kum na ka khanatang ba la batai bniah shaphang ka Nongstoin ka jaid Syiem Nongstoin ka hiar pateng na ki arngut ki kynthei shipara, kata na ka Matabai bad ka Matalah kiba don u para shynrang uba kyrteng u Roba lane u Robiah bad u pyrsa jong u Roba kum uwei na ki Rangbah. Kumba ngi tip ba shisien ki la dei ki jong ka Simsong Durgapur ia kaba ki la-synshar kum ki Syiem tad haduh ba kin da leit phet wir noh sha Nongstoin. Ka khanatang ka iathuh ba ka Matabai ha kawei ka sngi haba ka la sliang um bha ka la leit dih na kawei ka pung um ba ktieh khlem da tip ba ka dei ka umpynjhieh jong u syier shynrang, bad katba nang ia id ka por ka la kha ia i khun kynthei, bad dei na katei ka daw la ong ba i dei i khun kynthei jong u syier. U Syiem bad ki Rangbah ki la sngewbitar ia kane kumta ki la leit wad ia uta u syier shaduh ka wah Simsong (Someswar) bad ki la ioh pyniap ia u hajan Durgapur

kumta ki pynieng ia ki maw ban pyndonburom
ia ka jingjop jong ki. Kine ki maw ki dang
ieng haduh kito ki por kiba hadien.

Kumba la iathuh mynshuwa, ha ka kha-
natang ki khasi ba ka jaid Syiem Nongstoin
ka don ka jingiadei bad ka wah Someswari
bad Susang Durgapur. Kane ka jingiathuh-
khana ka lah ban long kaba shisha namar ka
jingia kajia pud lane iapher jingmut hapteng
jong ka Nongstoin bad ka Susang-Durgapur,
bad kane ka dang iai jia shi iai-jia haduh kine
ki por ba mynta. Ka lah ban long ba u Syiem
Rangnoh u la ialam ia la ka kynhun shipai sha
u pud jong u Raja jong ka Susang na ka
bynta ban leit dakhor jaka shuh kum ka dak
jong ka jingpynhiar kput, bad ban pakhang na
kano kano ka jingwan tap pud kumta u la buh
dak da ki maw ban pynsah jingkyntaw ia la
u pud u sam. Ka jingiathuhkhana puriskam
shaphang u Syier ka dei lehse tang ka khana
kai tang ban ioh pynkhray ia ki kam jong u
syiem Rangnoh jong ka Nongstoin. Hynrei ka
long kaba don jingmut ba ia uto u Syier uba ki
tharai ia u ba u dei u kpa jong ka khun kynthai
jong ka Matabai, ia ka Syiem Sad kim shym la
shim kum ka dak jong ka jaid Syiem jong ka
Nongstoin. Lym kumta kin ym pyntip ia u.

Ha kawei ka liang pat, ki Jaintia ki don la
ka khanatang ba hana ka jaid Syiem jong ka
Nongstoin, Langrin bad Nongspung ki dei kiba
hiar pateng na ka jaid Sutnga. Lada ngi

kohnguh kane, ba ia ki nongshem ne nongseng jong ki jaid Syiem jong kine ki hima, kata kiwan poi wir na ri lum Jaintia. Ka lah ban long ba ki la iaid sakma shaduh Susang-Durgapur hynrei ki la shah pynmih noh ha ki bor ba kham khlain jong u Raja jong kato ka ri.

KA TARIK ANTAD IA KA JINGSENG IA KA SYIEMSHIP

Kat kum ka khanatang ba la ai da ki Syiem, ka por jong ki nongialam ba nyngkong eh ka long kumne harum :—

- (i) U Roba lane u Robiah u la shah jop ha u para jong u;
- (ii) U Rangnoh bad u pyrsa u;
- (iii) U Borna; (iv) bad ia u da u pyrsa jong u, u Phon; (v) U Mut lehse u long u paralok jong u Tirot Singh, u Syiem jong ka Nongkhlaw. U Mut u la synshar haduh ban da iap, kata haduh u snem 1862.

Ka por jong ka jingsynshar jong kitei ki san nongialam, ka la long shispah arphew san snem (5×25 snem, lane ka por synshar ba ia ryngkat jong uwei uwei), bad lada ngi khate noh ia ka por naduh ka 1829 kata ia ka por ba u Mut u iadon ryngkat ha ka por ba u Tirot u dang im, kata ka long ha ka

1704 A.D. Ia kane ngi lah ban shim kum ka tarik antad jong ka jingseng ne jingsdang ia ka Syiemship Nongkhlaw. Wat la katta ruh, wat ia ka tarik ba kham mynshuwa jong ka jingsdang ia ka jylla, um shym pat la klet noh namar ia ka Syiemship hi la ong ba ka la sdang na ka thain Susong-Durgapur jong ka District Mymensing jong ka Bengal.

KA JINGPYNIAR JONG U RANGNOH

Shaphang u Syiem uba nyngkong, u Roba lane Rubiah ym shym la don kano Rano ka jingtip ba thikna shaphang ka jingsynshar jong u. Hynrei u pyrsa bad u nongioh pateng jong u, u Rangnoh u la long u nongsynshar ba pawnsam. U la pyniar ia ka jingsynshar ha Nongstoin ha baroh ki liang. Kat kum u H. Lyngdoh, u nongialam shipai uba kyrteng u Dewan Muhammud uba lehse uba peit bad pyniaid ia ka hima Laur jong ki rithor (kata ia ka Sub-Division Sonamganj jong ka Sylhet), une hana u ong ba u la hiar thma ia ka Nongstoin bad ia kiwei de ki jaka ba shajan jong ka Khasi Hills ha ka por ka jingsynshar jong u Rangnoh. U Syiem jong ka Nongstoin u la jop ia u Dewan Muhammud harud jong ka Wah Rilang lane Jadukata kumba la khot ia ka ha Sylhet. Ka la don ka jingthoh dak halor u mawsiang ba hajan ka Jadukata ha ki dak persian ia uba lehse la pynieng da u nonghiarthma Muslim ban pynsah jingkyrmaw ia ka jingleit hiarthma jong u ia kato ka jaka

jong ka Khasi Hills, kata ia ka Syiemship Nongstoin. La u nongthoh jong kita ki dak bad u Dewan Muhammad, u nonghiarthma Muslim ba la rim u dei ne-em u juh u briew, ym lah ban pynshisha namar ia kita ki jingthoh ba la thoh ki kham shitom ban pule. Ka lah ban long ba u Dewan Mohammad u la pynieng ia ka jingtei bad u la pruid dak halor jong ka. U B.C. Allen u la shu antad ba la tei da uwei na ki nonghiarthma Muslim, kane ka jingthoh dak te lehse ka la dei hi "ka record jong uno uno u nongshang pyrthei Muslim uba wad khyndew ban ioh spah ioh ksiar ha ka ri khlaw." Hynrei kane ka jingantad imat kam dei kaba thikna namar ha kata ka por ka Nongstoin bad ki Syiemship ba shajan na shaphang sepngi ki long kiba dang khyndiat briew eh bad ba duk bad kumta ia ka jingleit hiarthma jong u Dewan ym lah ban kheiñ kum ka jingleit hiarthma ba shu leh da ka bor. Na ki jingthoh jong ki phareng ba hadien ka pynpaw ba ki nongialam khasi ki shait mlien bunsien ban leit hiar thma sha ki rithor ba marjar ia ka Sylhet, kata kum ia ka Laur pargana ne hima. Kumta ia u Dewan Muhammad lane ia u nongialam Muslim uba la pynieng lane tei ia katei ka jingtei ba la thoh dak, u lah ruh ban ia lam ma u ia ka jingleit hiar thma kyliang sha Nongstoin kum ka jingpynhiar kput.

Kat kum ka khanatang Khasi, u Rangnoh u la jop ia ka Garo Hills na ka phang sepngi bad u la pyniar ia ka hima Nongstoin shaduh ka


Wah Brahmaputra na shatei, nalog kito ki jaka ba u jop ha Sylhet. Hynrei kane ka dei tang ka jinghren pynheh ia ka jingleit hiar thma jong ki shipai jong u Rangnoh. Namar la tip bha ba shibun na ki khyndew ki Garo ki dang iaisah laitluid tad haduh ka jingwan poi jong ki phareng. Hynrei ka dei ruh ka jingshisha ba shibun na ki shnong Garo bad Lyngngam la kynthuplang ha ka Syiemship Nongstoin. Ia kine ki shnong lehse la jop da u Rangnoh, hynrei kam mut ia ka Garo Hills baroh kawei. Na ki record jong ki phareng la shem ba ki Syiem jong ka Nongstoin bad ki nongpyniaid ba kham shapoh jong ki, ki shait mlien ban lum khajna na ki shnong rit ka Garo Hills kiba don ha ka ri thor Goalpara bad Kamrup kaba kynthup ruh ia ka iew ba pawnam jong ka Damerua. Ha ka snem 1831 u David Scott u la lap ba u Syiem Nurtung u don ka jingiaidei kaba jan bad u Syiem ka Nongstoin, dei une uba la ialam ia ka kynhun khnang ban lum khajna na Damerua bad na kiwei kiwei ki shnong shaduh ka wah Brahmaputra. Kane ka jingthoh jong ka Sorkar phareng ka pyni ba u Syiem Nongstoin u la pyniar ia la ka jingdawa khajna bad ka bor shaduh ka wah Brahmaputra. Na kine ki jingthoh baroh ka paw shai ba u Rangnoh u la long u Syiem uba khlain shibun eh.

KA JINGIADEI BAD KI MUGHAL JONG KA SYLHET

Ki record jong ki phareng ki pynshai shibun shaphang ka jingiaidei jong ki nongsynshar Mughal jong ka Laur pargana (Sylhet) bad ki nong-

ialam khasi jong ki lum ba shaphang sepngi, ia kiba la ju tip kum "Ki Laur Khasi". Ka paw na kine ki jingthoh ba wat lada don teng teng ka jing-ia-kynad bad ki thma hapdeng jong ki, hynrei ki pyrshang ban wallam ia ka jingsuk lyngba ka khaii ka pateng bad ka jing-ia-pynbeit lang bad ki khasi kiba don ha ri thor Laur jong ka Sylhet.

Ka jingiadei jong ki Mughal bad ki nongialam jong ka Nongstoin bad ka Langrin ruh ka la long kaba iajan bha, namar ka jingshaniah jong ki Mughal ha ki par mawshun jong kine ki artylli ki hima khasi. La ong ba baroh kawei ka Bengal Mughal ki shaniah ha ki par mawshun jong ka Nongstoin bad ka Langrin ha ka spah snem kaba khadphra, namar ki la long kiba nyngkong ha kaba pyntrei ia u mawshun. Hynrei ia ki par mawshun jong kiwei pat ki hima khasi ha ka khappud-Sylhet la pyntrei kam slem hadien ka jingsdang ia ki par jong ka Nongstoin bad ka Langrin. Ki nongialam jong ki rilum ki shait ai wai ia ki par jong ki hima jong ki sha ki mynder ri bad ba kumno kine ki pyntrei kam ia ki bad leit kit ia ki maw sha ki rudwah jong ka Surma khnang ban pynkit ia ki sha Bengal bad Calcutta. Naduh ki por barim ba-jah la ong ba hana ki nongialam jong ka Nongstoin bad Langrin ki shait mlien ban ai wai ia ki par maw sha ka Sorkar Mughal kumta ka la thung ia u Dewan jong ka Laur bad ia kiwei kiwei ki nongkhaii ban tih ia u maw bad ban pynkit ia u sha rithor. Wat la katta ki jingpynbeit halor ki kam ki jam kim shym long kiba beit hapdeng ka Sorkar



Mughal bad ki nongialam khasi. Ki nongialam ki shait thung da ki briew na ki thain rithor jong ka Sylhet kiba khot ki Doaradar, kiba ju trei kam hapteng jong ki. Imat kumba tang kine ki Doaradar (ki nongap jingkhong jong ki riwulum) kiba don hok ban leit rung sha ki ri lum bad ban ia pynbeit ia baroh kiei kiei kiba-iadei bad ki par mawshun. Khlem ka jingbit na ki ym shah ia uno uno ruh u nongkhaii ban-leit rung sha ri khasi. Ki nongkhaii Mughal ki shait thung ia ki nongtrei na sha rithor ban tih maw bad ban wan kit ia ki da ka lieng sha ka Wah Surma. Ha kane ka rukom ka khaii ka pateng ba iajan bha ka la iaidei bha hapteng ki khasi bad ki Bengali jong ka Sylhet da bun spah snem.

Ki Khasi ki la sngewtyinnad bha ba ki ioh ia kane ka lad ban ia khaii pateng bad ki rithor namar ba ia ka mluh bad u khaw ki shaniah ba ki. Nalor kata khnang ban pynkhlain bha ia ka jingiateh lok jong ki bad ki khasi, u Dewan jong ka Laur u la ai bor ia ki ba ki lah ban shong ban sah bad ban rep ban riang halor ka khyndew ka shyiap ha rithor. Ki Khasi ki la ioh lad ban seng shnong ha Laur Pargana. Katba nang iaidei ka por, ka la wan rah ia ka jingiateh lok bajan hapteng jong ki bad ruh da ka jingia shongkha shongman hapteng ki khasi bad ki Bengali jong ka Sylhet. Kumta katto katne na kiba ha iing ha sem ki la shong ha rithor bad kiwei pat ki shong ha rilum Khasi, kito kiba shong ha ri-thor ki la pdiang ia ka ktien Bengali; ia ka niam Hindu ne Muslim bad ia shibun kiwei kiwei de ki niam

ki rukom. Ki dei kine ki khasi kiba la jer kyrteng ha ka record jong ki phareng kum Ka "Bengalee Cosseahs". Namar ka jingpyniaid ba laitluid jong u nongsynshar jong ka Laur, shibun bah ka khyndew ka shyiap kaba don shaphang shatei lam sepngi jong ka Surma ka la hap ha ka kti jong ki khasi. Ki nongialam jong ki jylla khasi ruh ki la ioh long trai ia shibun bah ka khyndew ha Sylhet. Hateng hateng ka shait mih ka jing ia kajia halor ka khyndew, ka shyiap, kumta kane ka wallam ia ka jing-ia-kynad bad ia tur pyrshah hapteng jong ki. Ia kane ka jing-ia-kyn-ad hapteng jong ki ha ka record jong ki phareng la ong ba "ki pynsyriem ia ka jinglong riewkhlaw" jong ki riewlum. Wat la katta, dei ban buh jingkyrmaw ba kum kata ka jingiapher ba hateng hateng ki ju jia bha ha ka por ba ki dang don ha ka juk jong ka Feudal System.

U Borna, u Phan bad u Mut (1729-1829)

Ia u Borna, u Phan bad u Mut kine ki dei ki nongioh pateng jong u Rangnoh hynrei shaphang jong ki ngim lah ban ai kano kano ka jingtip kaba thikna namar ba kat kum ka khanatang ym don ei ei shaphang jong ki. Hynrei ngi don ka daw ban ngeit ba ha ka por ka jingsynshar jong ki, ki Laur khasi kata kynthup lang ia ki nongialam ka Nongstoin bad Langrin lehse ki la ialeh thma pyrshah ia u nongialam Mughal jong ka Laur uba ki khot u Dewan. La ong ba ha ka

snem 1744 shibun bha ki nongialam khasi ba kynthup ia kito ki jong ka Nongstoin bad Langrin ki la leit hiarthma ia ka shnong Laur, ia ka nongbah jong u Anwar Khan la pynjot syndon ia ka. Kumta u Dewan u la dei ban pynkynriah noh ia ka nongbah sha kawei pat ka shnong kaba khot ka Baniachong kaba dei kawei na ki nongrit ha Sylhet. Ngini lah ban ong uei uba long Syiem ha kata ka por ha Nongstoin, lehse ka lah ban long uwei na kine, u Borna ne u Phan. U Mut kum u paralok jong u Tirot lehse um shym la don bynta ha ka jingleit hiar thma namar ba ha ka por ka jingsynshar jong u ki phareng ki la kyrshan ia ka khappud Sylhet pyrshah na ka jingleit tur jong ki Khasi.

Ki jingiadei bad ka Company

Ha ka snem 1765 ka district Sylhet ka la lap hapoh ka jingsynshar jong ka East India Company bad ka la ioh lut ia ki hok jong ki Mughal baroh. Ha ka snem 1772 ka Company ka la thung ia u W.M. Thackeray kum u nonglum khajna ba nyngkong eh jong ka Sylhet bad u nongpeit ia ki jingmyntoi jong ka Company ha ka district u la wanrah ia ka jingiadei ba iajan bha bad ki nongialam khasi jong ka khappud Sylhet, khamtam eh bad ki nongialam jong ka Nongstoin bad ka Langrin namar ba ki syiem Langrin ki don ia ki par mawshun kiba lah ban wan rah ia ka jingmyntoi shibun bah. Hadien ka jingiateh kular bad kine ki nongialam u la shim biang ban pyntrei kam ia ki par jong ka hima da

u Agent jong ka Company. Ha ka juh ka por u la pyntrei kam na ka bynta ban ker ban da ia ka khappud na kano kano ka jinghiar thma na ki thain ri lum. Ia u Thackeray la bud pateng da u Robert Lindsay kum u nonglum khajna jong ka Sylhet. Ha ka por jong u Lindsay ha-u snem 1787 A.D. ki 'Laur Khasi' lehse bad ki nongialam jong ka Nongstoin bad Langrin ki la leit hiarthma ia ka rithor jong ka Laur. Kane ka jingleit hiarthma ba shyrkhei ka la pynjulong ia ka spah ka phew bad ia shibun ki mynsiem ruh ngi la duh. Ka Sorkar ka la pyntrei kam jur bha ia ka ban pynshitom ia ki nongwan hiarthma, ia ki katto katne na ki la kem bad la rai ban set ia ki ha iingbyndi slem slem bha. Ia ka jingthmu jong kane ka jinghiar thma ym lah ban sngewthuh. Hynrei kito ki khasi ba shah kem ki phla ba dei tang na ka daw jong ka jingiap thngan ha ri lum kaba la pynlong ia ki ban leit hiarthma. Ka don ka daw ban ngeit ba ki khasi ki la pynlong ia kane ka jingleit hiarthma ia ka khappud jong ki phareng da ka jingiakut ba jar-jar bad u Dewan jong ka Laur uba la ia sngewthuh jingmut ia ka jingdawa jong ka Company ban siew noh ka khajna khyndew kaba kham heh.

Hadien u Lindsay lawan da uwei pat u nonglum khajna ha Sylhet, u John Willes. Ha ka por ka jingpyniaid jong u, la jan baroh ki Syiem khasi jong ka khappud Sylhet ki la leit hiarthma lang pyrshah ia ka Company ha ka snem 1788. Ka thma ka laneh haduh ka snem 1792 A.D. Ki Bengalee khasi ruh ki

la iasnoh lang bad kane ka jingiakhiih, ki daw ba kongsan eh jong ka jingbthei kane ka jingia khiih ka dei na ka bynta ba ka jingioh khajna jong ka Sorkar, bad dei na kata ka daw ki khasi baroh ki la pyrshang ban ia tylli lang baroh ha ki bynta ba shaphang shatei lam sepngi jong ka Surma. U Gunga Singh u Syiem Bengali khasi uba khlain bor u la leit rah da ka ding bad ka waitlam sha ki jaka jong ki phareng. U la shah kem noh ha Shella ha ka por ba u dang long Syiem. U Buh Sing bad u Subba Sing ki la long ki Syiem jong ka Mawsmat bad ka Cherrapunjee ryngkat bad hajar ki Khasi kila ioh knieh ia ka shnong ba shait long iew jong ki Pandua na ki phareng. Ka Sorkar ka la hap buh shibun bah ki kynhun shipai khnang ban lah ban pynsangeh ia ka jingpynthud jong ki khasi. Hadien ba ka la pynsangeh ia ka jingpynthud, ka sorkar ka la knieh noh ia baroh ki pargana kiba ha ri thor kiba shong ki khasi. Katba ka Sorkar ka khang ban leit tur sha ri lum, ha kajuh ka por kam shah ia ki Syiem khasi ban bat ia kano kano ka khyndew ha rithor Sylhet. Khnang ba pynduh bad pynjah ia ki daw jong ka jingiakajia kiba lah ban sa wan jia hadien bad ki khasi, ia ka khaï ka pateng ki la pynbeit rynth. Ia ki trai shnong bad ia ki phareng ruh la khang ba kin leit sha ri lum na ka bynta ka khaï ka pateng bad kiwei kiwei de ki jingthmu. Kane ka jingkhlain bor jong ki shipai phareng ka la ktah shibun eh ia ki syiem khasi. Namar-kata ki sa ia trei lang bad ka Sorkar wat la ki don katto katne ki jingpynwit pyrshah ia ka ruh.

KA JINGBYRNGEM JONG U SYIEM NONGSTOIN BAN HIARTHMA

Kumba katto katne por ka shu iaid hi kumto, hynrei ha ka snem 1817 u Syiem jong ka Nongstoin, u Phar lane u Mut ki la pyni ia ka jinglong ba pyrshah ia ka Sorkar, kumta ka thma ka la khie hapteng jong ki. Ka jing-sdang jong ka jingia kajia ka dei na ka bynta ki par Mawshun jong ka Laur, hapteng ki Syiem Nongstoin bad Langrin, bad ka jingia pyrshang ha ka khai ka pateng hapteng u nongkhai phareng, u George Inglis bad uwei u briew na France, u De Fauchy. U Syiem jong ka Langrin u la ai wai ia baroh ki par sha u George Inglis uba trei na ka bynta jong ki lyngba ki nongtrei sngi jong u ia kiba u la wan rah na Sylhet. Kumba katto katne snem kynsan kynsan u Syiem jong ka Nongstoin u la dawa ba kine ki par ki dei ki jong u. U la beh noh ia ki nongtrei sngi jong u George Inglis na ki par bad u la kem koidi ia ki katto katne.

U Syiem Nongstoin u la pynbna ba un shah ia u nongkhai phareng ban pyntrei ia ki par ba don ha ki pud jong u ia kiba u la ai wai sha u De Fauchy. Ka jingleh trai khlieh jong u George Inglis halor ka jingkhai mawshun da ka jingiarap jong u nongbishar jong ka Sylhet ka la pynsngewsih shibun eh ia ki nongkhai bad ia u Syiem jong ka Nongstoin. U Syiem jong ka Nongstoin u la rai ban pynsangeh noh ia kane ka jingleh don bor U George Inglis

u briew jong ki phareng, Kumta u la shah byrngem ha u Syiem jong ka Nongstoin, ka Sorkar ka la shim bynta halor kane ka jingia kajia. Ka la shim noh ia ki par jong ki lum Laur na baroh arliang, kata na ki nongkhaï phareng bad French, bad ki la pynbor ia ki Syiem jong ki Nongstoin bad Langrin ban pyntrei noh ia ki da la ki jong ki Ophisar tad naduh ba ka jing-ia-kynad halor ka jing-long trai hapdeng jong ki ka la beit. Dei ha kane ka rukom ia ka jingbyrngem ia ka jingiasuk la lah ban pynsangeh noh. Ka Sorkar na ka liang la jong ka la siew ia ka bai wai ba shisnem shisnem bad ka la ai sngewbha sha baroh arngut ki Syiem khnang ban pynsngewbha ia ki. Ka jingmih na kane ka jingia long paralok bha ha ka khaï ka pateng jong ka Nongstoin bad ka Langrin ka long ba kin shu ia sah pdeng ha ka por ka jingialeh thma jong ki khasi pyrshah ia ka Company ba hapoh ka jingialam jong u Tirot Singh.

KA SYIEMSHIP JONG KA LANGRIN

Shaphang ka thymmei jong ka Syiemship jong ka Langrin, ym shym la don kano kano ka khanatang. Hynrei ka long kaba donkam namar baroh ki jylla ki don la ki jong ki khana na ka bynta ka thymmei jong kawei pa kawei ka Syiemship.

Ki Syiem ba hadien jong ka Langrin ki la iathuh ha ki nongpyniaid Sorkar phareng ia la

ka jong ka jingbieit shaphang jong ka, namar ba ka Syiemship jong ka Langrin kandon la ka jong ka thymmei tynrai. Kum ban shu ong ka wan mih la slem bha hadien ka Syiemship jong ka Nongstoin bad kiwei pat ki para syiemship ba ia marjan bad ka.

Wat la katta ruh, ka don ha ka puriskam Khasi bad Jaintia ruh ia kiba la kdew mynshuwa ba ki jaid Syiem nongsynshar jong ka Langrin & Nongstoin ki hiar pateng na kajuh ka kmie tymmen kum ka jong ka Nongkhlaw, Nongspung bad ka Sutnga. Lada kane ka long kumta ka lah ban long lehse ba ia ki shnong ki thaw bad ki khyndew ki shiap jong ki la pynlong beit ha kawei ka por tang kawei ka Unit synshar hapoh kawei ka jaid Syiem hi kaba don ar lane bun ki kpoh, u khliehduh jong ka tnad ba kongsan u synshar na Nongstoin bad kawei pat ka tnad synshar ka synshar na Langrin. Hynrei kat kum ka rukom khasi u Syiem um don ka bor halor ki khyndew ba don da bun jaid ki briew ha ka shnong wat lada ia ka Ri-raïd la shim beit kumba ka long kyrpang lane ka khyndew Ri-kynti jong kawei ka shnong. Ki Syiem ki don ka bor ban die ia la ka khyndew katba ki sngewbit tang ba ka dei banlong kat kum ka ain jong ka rukom khasi. Ki jingbuhdak ia u Pud u sam jong ki khyndew ki shiap ba la shong da bun ki jaid briew ha ki shnong ki thaw ha kito ki jaka ba la shu iehnoh shrah kumto ruh barabor ka pynshisha ba ka long ka kam

kaba da eh tam ha Khasi Hills. Lada uno uno u Syiem jong ka hima lane ka shnong u kwah ban pyniar ia ki pud ki sam jong ka ilaka jong u, u lah da kaba jem eh ban thaw ia ka jingia kajia pud. Lada ngin pynshong nongrim ia kine ki jinglong ba la ju jia ha ki spah snem ba pdeng jong ki hima khasi, lehse ngim lah ban lap ia ka daw jong ka jingia kajia khappud hapteng ki Syiem jong ka Nongstoin & Langrin ha ka snem 1821 ia kaba la kdew mynshua bad kumjuh ruh ia ka jinglong laitluid jong ka Langrin Syiemship.

Nalor kata, ia ki jingia kajia khappud halor ki par mawshun jong ki lum Laur imat ki la nang pynkloi ia ka jingkhlad syndon hapteng ki iing Syiem jong ka Nongstoin bad ka Langrin. Shuwa ba ngin bishar bniah ia ka daw jong kane ka jingia kajia khappud bad ia ka jingktah jong ka jingiadei hapteng ki Syiem jong kine ki hima, kan kham ai jingshai lada ngin iathuh shuwa ia ka history jong ka jingtrei kam jong ki par mawshun jong ka Laur.

Ha Shuwa ka jingwan jong ki nongkhaii phareng ha Sylhet kaba don hapoh ka jingsynshar jong ka Company, ka paw kumba ka Sorkar Mughal ka shait mlien ban shim wai ia ki par na ki Syiem jong kine ki ri lum bad ban ai contract pat ha u Dewan jong ka Laur. U pat na ka liang jong u u shait mlien ban iasam ia ki par mawshun ba bun tylli hapteng uwei pa uwei u nongkhaii jong ka rithor ban pyntrei

kam ia ki. Kat kum ki jingphah ktien phah khubor jong u Thackarey shaphang ki jinglong ki kam ki jam jong ki par mawshun jong ka Laur, ka pynpaw barobor ba ka shait don ka jing-ia kajia halor ka kam kaba iadei bad ki par hapdeng ki Syiem riwulum bad ki nongkhahi mawshun. Ka jingia khahi ia u mawshun jong ki lum Laur ka long kaba iohnong bha ha kito ki sngi Nalor kata ia ki par ba la pyn-trei da ka Sorkar Mughal bad ki nongpeit jong ka, uwei pa uwei u nongkhahi ruh u ju shim wai ia ki par ha Laur na ki Syiem ban khahi laithuid ia u mawshun. Ka jingkylla ba khraw shibun ka la jia ha ka liang kane ka jingkhahi ynda u George Inglis u la pynbor ia ki syiem jong ka Langrin ban ai wai ia baroh ki par mawshun jong ki lum Laur ka-ba naduh na Buggle Cherra shaphang sepngi shaduh Puntit ba shaphang mihngi bad ia ki la khot ki Raid English & Co., ha u snem 1871 tang ha ka baiwai kaba Rs. 75/- ryngkat bad ki jingai sngewbha. Kum ka jingmih nangta, ia kiwei kiwei pat ki nongkhahi ba kynthup ia u Dewan jong ka Laur la pynbor ba ka dei ban thied mawshuh na u George Inglis, uba shait die ha ka dor kaba bit bha. La mih ka jingsngewsih kaba khraw hapdeng ki nongkhahi jong ka Sylhet halor ka jingleh donbor ia ka khahi shun da u George Inglis. Uwei pat u Syiem jong ki lum Laur u dei u Syiem jong ka Nongstoin. Ha kaba nyngkong i kumba um shym ioh kano kano ka jingmyntoi na ka jingshimwai ia ka khyndew jong ka Laur

da ki Syiem jong ka Langrin kaba ka shnong jong ki ka don ha ka khappud Sylhet, katba ka shnong Nongstoin ka dang kham pajieh khyn-diat. Hynrei ynda ki Syiem jong ka Langrin ki la ioh pdiang ia kaci kaba i kumba ka dei ka spah bah ba khraw kum ka baiwai bad ki jingai sngewbha da kaba aiwai ia kine ki par bakhraw kiba long tang kum ki khyndew iehnoh shrah, u Syiem jong ka Nongstoin kynsan kynsan u la kyndit bynriow. Kat kum u George Inglis u Dewan jong ka Laur ryngkat bad kiwei kiwei de ki nongkhaii ba ia pyrshah ki la kynshuit napoh napoh ia u Syiem jong ka Nongstoin bad pynshit ban dawa ia shibynta na ki par jong ka Laur u ruh u la leh kum-ta, bad kumta ka jingia kajia hapdeng jong u bad ki Syiem jong ka Langrin ka la sdang. U Syiem jong ka Nongstoin ha kaba nyng-kong u la ai wai ia ka shibynta jong ki par sha u Dewan jong ka Laur. Hynrei u nong-bishar jong ka Sylhet u la pdiang ia ka daw jong u George Inglis halor ka jingajor jong u bad u sa pynduh noh ia ka jingaiwai. Hadien kata u la ai noh ia ka jingaiwai sha u nongkhaii French. U George Inglis u la ujur ia u Raja jong ka Langrin na ka bynta ka jingwan tap pud sha ki jaka ba la shim wai ma u ba khlem kano kano ka jingmih tang namar ba u long u Syiem uba tlot. Te kumta u la appeal sha u nongbishar ban pyn-beit ia kane ka jingia kajia pud, hynrei namar ba ki Syiem khasi ki long kiba laitluid ha kane ka por, ka Sorkar kam lah ban tuklar

halor jong ka. Haba la wad jingtip thikna halor ki jingdawa jong u Syiem Nongstoin, u nongbishar u la shem ba u Syiem Nongstoin lehse u lah ban don katto katne ki hok ba shongnia. Hynrei u Syiem jong ka Nongstoin u kham shaniah bha ha la ka jong ka jingkhaji bad ka bor ba long kham halor ban ia ka jong u Raja jong ka Langrin, uba la kyntait noh ban iasiew lang ia ka baiwai ryngkat bad u syiem jong ka Nongstoin. Ka long namarkata kaba shai ba ka jinglong trai ia ki par ba don ha ki thain jong ka Laur, ka dei ka jong baroh arngut ki Syiem jong ka Langrin Nongstoin. Ha kawei pat ka liang, ki dei ki Syiem jong kajuh ka hima bad ki ba ia kajia halor ka jingia bynta ia ka baiwai kaba la pynlong ia ki Syiem jong ka shnong Langrin ban mih noh ne khlad noh na ka Syiemship jong ka Nongstoin. Ka lah ban long ruh ba u George Inglis u shait ai ka jingai sngewbha lang bad ka baiwai de kaba heh sha ki Syiem jong ka Langrin bad u la pynbor ia ki Syiem jong ka Langrin ban pynioh ia ka jinglong laitluid na ka Nongstoin kaba ki Syiem jong ka ki ia long pyrshah bha ia u bad na shadien jong u George Inglis pat ka don ka jingkyrshan da u-nongbishar jong ka Sylhet. Da kaba sngewshlur ia-kane ka jingkyrshan jong ki, ki Syiem jong ka Langrin ki sa ia pait noh na ki jingiateh ba la rim bha bad la ki jong kiba ha iing ha sem. Ki Syiem jong ka Nongstoin ki la shimti ia la ka jinglong ba laitluid halor la ka shnong kaba don ki parmawshun kaba ki sngew ba kine ki dei ki khyndew

Ri-raïd jong ka ilaka jong ki ha kaba ki Syiem kim don ka hok. Wat la katta ruh ha kaba dawa ia ki par mawshun ba don ha ki bynta lum baroh kawei jong ka Laur kum ka khyndew Ri-raïd, u Syiem jong ka Langrin lehse u la iaïd palat ia la ka jong ka hok bad u la tappud sha ka bynta Ri-raïd jong ki Syiem jong ka Nongstoin namar ia ki pud ki sam jong u lehse um shym la buh dak bha. Ha kawei pat ka rukom, dei tang na ka bynta ka jingbit jingbiang jong ki nongkhaii phareng ka la wallam ia-kate ka jingia pait jong ka Langrin & ka Nongstoin. U Syiem jong ka Nongstoin lehse um shym la don kano-kano ka jingujor ia ka jinglong ba laitluid jong ka tang lada u ioh belt ia la ki jong ki par mawshun ki ban wan rah jingnyetoi kum ka baiwai bad ki jingaisngewbha ynda ka Sorkar ka la tyrwa ban siew ia kajuh ka baiwai bad ki jingaisngewbha, u Syiem Nongstoin u la ai ia ka Leasa jong ki par mawshun ia kaba u la dawa sha ka Sorkar, hynrei ym sha u George Inglis namar u George Inglis u la lah siew ia ka baiwai baroh sha u Syiem jong ka Langrin. U Syiem jong ka Nongstoin um shym la pynniñ kano kano ka jingujor halor kane namar ki Syiem Khasi ki shait ioh hi, ia ka jinglong ba laitluid tang da kaba ki shu pyndem Syiem ha uto u Syiem uba ha khlieh duh.

Kine ki la jong ki daw bah ba kongsan ha kaba ka Syiemship ba laitluid jong ka Langrin ka la wan paw pythci. Kawei pat ka daw ka long ba la lah ban pynrei kam ia ka jingpynia-khlad ia ka Langrin na ka Nongstoin. Ki Syiem


jong ka Langrin ki la lah ban rai ia kane ka jing-laitluid namar ba la kyrshan bor ia ki da ka shnong baroh kawei. Kane ka la pynpaw ba kan don jingeh ia ki nongshong shnong jong ka Langrin namar ba ki nongialam jong ki ki long kiba bit ban long Syiem bad ba ki dei ruh na ka jaid Syiem. Ka lah ruh ban long ba ki jaid Syiem ki la pynlong khnang ka jingialang paitbah ha shnong khnang ba kin ioh ia ka jinglong ba halor ka jingshimti jong ki ia ka jinglaitluid. Ia ka Khasi Hills ha ka por ka jingsynshar jong ki phareng la shem ba na ki arphew san tylli ki hima kiba la ithuh da ka Sorkar, hynrei dei tang ia u Syiem jong ka Langrin ba ki nongshong shnong ki jied da kaba ki shu iathep vote wat la i long i hima barit, ha kiwei pat ki hima ia u Syiem la jied da ki katto katne kiba kham rangbah ha ka jaid bad ki Syiem. Ka lah ban long ba ka rukom synshar paitbah ka dei tang ha ka Syiemship jong ka Langrin namar ba ka jingjied ia u Syiem laitluid ba nyngkong eh jong ka hima ka dei beit da ka jing iathep vote jong ki nongshong shnong.

Note:— Ki Syiem kiba nyngkong eh jong ka Langrin:—

Kat kum na ka puriskam, u Syiem uba nyngkong eh jong ka Langrin u dei u Omar Rajah lanc u Lar uba dei na ka kpoh jong ki Syiem iong. Ia u Syiem uba nyngkong eh jong ka Langrin kumba la iakren sha khmat, u dei uto uba ai ia ka lease jong ki par mawshun jong ka Laur sha u George Inglis ha u snem 1817. Kumta u

George Inglis ha ka jingthoh petition jong u sha u nongbishar jong ka Sylhet ha u snem 1823 ula batai ba ia ka lease 'la ai sha ka Firm jong ka Raid English & Co., jong ngi ha ka kyrteng u khun jong u, u George Inglis bad u James Stark da u "Omar Rajah, ka Rancee Jummye bad kiwei kiwei de ki Syiem Cosseah jong ka Lungree Poonjee". U Syiem ba nyngkong ia uba la jer kyrteng ha ka kot jingthoh petition u la pyndep ia ka jing-ia kular ba iadei shaphang ka lease ha u snem 1817. Kumta ia katei ka snem lah ban khein kum ka tarik jong ka jingsdang nongrim ia ka Syiemship Langrin ba laitluid. Ia u Omar lane u Lar Sing la bud pat da u pyrsa jong u u Sundar Singh (lane u Shillong Singh). Hynrei ym shym la ioh jingtip ei ei ruh shaphang ki kam jong ki. Ha ka thma Khasi ba la ialam da u Tirot Singh bad ki nongbud jong u pyrshah ia ka Sorkar (1829-1833) u Syiem jong ka Langrin. Ka lah ban long ba u dei u Omar Lane u Sundar ha kata ka por namar ba ki ju ia long paralok lypa bad ka Sorkar kumta ki la shu ia ieng hapdeng.

Ha ka por ka jingsynshar jong ki phareng, ki kpoh na ka jong ka Syiemlieh ruh ki dawa ia ka bor synshar Syiem. Hynrei ka jaid Syiemlieh pat lehse ka la leit phet wir noh sha Langrin slem slem hadien ba ka kpoh Syiemiong ka la seng ia la ka jinglaitluid jong ka hima tang hamar shwa ka jingwan jop jong ki phareng ia ka Khasi Hills.



KI kot ba la pynmih da i juh i Nongthoh,:

(1) Ka History ka Ri Khasi - Jaintia

Part I

(2) Ka History ka Ri Khasi - Jaintia

Part II

VOL I, VOL II, VOL III

Rs. 12.00

KHASI BOOKS
Room 101
Shillong Super Market
Naykhar Main Road
Shillong-2.